

**Месяца октовриа в 15-й день**  
**Священноисповедника Афанасия, епископа Ковровскаго**

Тропарь, глас 4:

Славы Божия ревнителя/ и благолепия церковнаго блюстителя,/ тесным житием и многими подвиги/ великому иерарху Александрийскому подобника,/ святителя Афанасия, исповедника Российскаго,/ усердно восхвалим, вернии./ Сей бо присно молится/ о спасении земнаго Отечества своего/ и о всех живущих в нем,/ велегласно с любовью взывая:/ Русь святая,/ храни веру Православную,/ в нейже тебе утверждение.

Кондак, глас 3:

Днесь Афанасий святитель,/ Христов исповедник и праведник,/ в невечернем Царстве Славы/ светло ликует/ и в сонме всех Русских святых,/ всесоставным гласом победную песнь воспевая,/ прилежно молит о нас/ Превечнаго Троидинаго Бога.

